



A-N-T-I

ALIANSA NASIONÁL TIMOR-LESTE BA TRIBUNÁL INTERNASIONÁL
Sekretariadu Temporáriu: La'ó Hamutuk, Institutu Timor-Leste ba Analiza no
Monitorizasaun ba Desenvolvimentu

Rua dos Martires da Patria, Bebora, Dili, Timor-Leste

P.O. Box 340, Dili, Timor-Leste

Tel: +670-3321040 or +670-7234330 or 7367518 / 7237176

e-mail: lanarra.del@gmail.com or maubere_oan@yahoo.com

Website: www.laohamutuk.org

DEKLARASAUN HAMUTUK MEMBRU ANTI¹ KONA-BA KAZU MILÍZIA BESI **MERAH PUTIH** **VALENTIM LÁVIO**

Introdusaun

Iha loron 08 de Jullu 2011, Tribunál Distritál Dili lee desizaun finál ba kazu krime grave ho No. 13/C.Ord/2011. Kazu ne'e hanesan kazu ida ne'ebé iha relasaun krime kontra humanidade ne'ebé involve kondenadu Valentim Lávio hanesan membru milísia Besi Merah Putih (BMP) hasoru vítima Patricio Sarmiento Viegas iha loron 06 Setembru 1999, liu loron rua anúnsia rezultadu referendu ne'ebé administra no kontrola husi Misaun ONU iha tinan 1999.

Lihosi prosesu julgamentu iha Tribunál Distritál Dili nu'udar Tribunál Primeira Instânsia, ikus mai hamonu sentensa ba kondenadu ne'e ho tinan 9 iha prizaun.

Julgamentu ba kazu krime ne'e hahú iha fulan Maiu nia rohan no dirije husi Juiz koletivu ne'ebé kompostu husi Juiz internasionál João Felgar (Juiz Prezidente), Juiza Internasionál Rosa Brandão (Juiza adjuntu) no Juiz Nasionál Deolindo dos Santos (Juiz adjuntu) no husi Ministériu Públiku representa husi Prokuradór Internasionál Franklin A. Furtado, no kondenado rasik hetan apoiu legál husi Defens'or Públiku Fernando Lopes de Carvalho SH.

Maske Tribunál Primeira Instânsia hamonu ona sentensa ba kondenadu Valentim Lávio, iha loron 08 Jullu 2011, maibé to'ó ohin loron (kuaze fulan tolu ona) prosesu ba kazu ne'e seidauk iha ninia finalidade tanbá seidauk iha ezekusaun ba desizaun finál tribunál ninian ho razaun ne'ebé mak la razoável tanbá Juiz presidente ne'ebé dirije kazu ne'e seidauk fó notifikasaun eskrita ba intresadu sira, tantu família vítima ka arguidu/kondenadu. Tanba ne'e kondenadu

^{1 1} Membru ANT no Parseiru sira: JSMP, La'ó Hamutuk, Asosiasaun HAK, Luta Hamutuk, FONGTIL, KBH, KSI, CDI, MDI, CUP, Front Mahasiswa, FOKUPERS, OPVG no ETCRN, Komité 12 Novembru no ICTJ (parseiru).

Valentim Lávio sei kontinua livre iha li'ur no goza ninia direitu hanesan ema bai-bain iha Liquiça.

Membru ANTI ka Aliansi ba Tribunál internasionál, preokupa no lamenta tebes-tebes katak Juiz internasionál sira la servisu ho profesionál no kaer sira nia papél ho responsabilidade, hodi la consegue formula akordaun julgamentu ba dezisaun ekrita ne'ebé tenke han tempu kuaze fulan tolu nia laran ona.

Prolongamentu ne'ebé la iha klarifikasaun no la nesesáriu hanesan ne'e, sei prejudika tebes interese parte sira hotu, tantu ba família vítima no povu tomak ne'ebé hakarak justisa ba kazu ne'e no mós ba arguidu rasik;

Prolongamentu no servisu ne'ebé la eficiente hosi parte tribunál nian ne'e bele hamihis konfiansa públiku ba setór justisa formál, partikularmente ba kazu ida ne'e, nune'e mós bele fo fatin ba parte sira atu uza dalan ne'ebé la nesesáriu atu buka justisa rasik tuir sira nia konsiénsia no provoka situasaun seluk ne'ebé ita la hakarak.

Tanbá ne'e Aliansa Internasionál ba Tribunál Internasionál (ANTI) hamutuk ho ninia membru tomak hakarak hato'o deklarasaun hodi ejize ba instituisaun relevantes sira, liu-liu Juiz Tribunál Distrital Dili nian mak hanesan tuir mai ne'e:

1. Ejize ba Juiz koletivu liu-liu ba Juiz Presidente, Dr. João Felgar, Juiz Internacional ne'ebé prezide julgamentu ba kazu Krime Kontra Umanidade 'Milisia Besi Merah Putih' Valentim Lávio atu fó prioridade no konsentrasaun tomak ba kazu ne'ebé NIA prezide ne'e hodi la bele dada tempu naruk atu hasai karta notifikasaun kona-ba desizaun finál tribunál nian ba família vítima no arguidu.
2. Ejize ba Juiz koletivu ne'ebé lidera husi Dr. João Felgar, Juiz Internacional ba prosesu Julgamentu kazu Krime Kontra Umanidade 'Milisia Besi Merah Putih' Valentim Lávio, atu aselera karta notifikasaun kona-ba desizaun finál tribunál nian tanba:
 - Refere ba prinsípiu julgamentu justu, efetivu, efesiénsia, no baratu tuir prinsípiu julgamentu di'ak (*fair trial*) iha rai demokrátiku sira
 - Refere ba artigu 60 (i) KPP, hateten katak *atu hato'ó rekursu hasoru desizaun ne'ebé desfavorese nia, tuir lei*; signifika katak artigu ne'e fo direitu ba kondenadu ka vítima hodi bele halo rekursu bainhira tribunál primeira instánsia hasai ona karta nofitikasaun kona-ba desizaun finál tribunál nian ba parte sira; Infelizmente to'o agora tribunál seidauk hasai karta notifikasaun ne'e ba parte sira;
 - Ami preokupa katak arguidu ne'ebé sei livre hela bele halai ba estranjeiru ka Indonézia tanba depois Juiz anúnsia desizaun orál, la inklui medida koasaun ruma la'o tuir akordaun Juiz nian;
 - Ejize mós ba Ministériu Públiku atu ezejuta desizaun tribunál primeíru instánsia kuandu la iha tan prosesu seluk hanesan rekursu husi parte sira;

Ami konklui deklarasaun konjunta ida ne'e, hodi apela ba entidade hot-hotu, públiku Timor Leste, vitima no familia vitima sira, tantu individu ka koleтиву atu kontinua ezije justisa ba krimi pasadu sira, tanba direitu ba justisa nu'udar parte integral husi vida sosiedade demokratiktu ida nian.

ANTI fiar katak sei la iha dezenvolvimentu ida ne'ebé kompletu kuandu la iha justisa ba krimi pasadu.

Atu hetan informasaun klean liu tan favor kontaktu:

Sisto dos Snatos
Koordenador Board ANTI
Email: lanarra.del@gmail.com
No Telefone: 7266564

Ou bele kontaktu:
Jose Moniz
ANTI-JSMP
Email: moniz@jsmp.minihub.org
No Telefone: 7402231